

AGX GROUP PERLUAS OPERASI KE VIETNAM MENERUSI LANGGANAN SAHAM DALAM SYARIKAT LOGISTIK

 bernama.com/bm/news.php

September 7, 2024



KUALA LUMPUR, 9 Julai (Bernama) -- Penyedia penyelesaian logistik, AGX Group Bhd merancang untuk memperluaskan operasinya ke Vietnam dengan membeli 60 peratus ekuiti dalam AGX Logistics (Viet Nam) Co Ltd melalui perjanjian pemegang saham dengan melanggan 180,000 saham pada harga RM334,000.

AGX dalam satu kenyataan hari ini berkata baki 40 peratus kepentingan ekuiti akan dipegang oleh warga Vietnam, Dang Huynh Ba Thanh dan Lam Minh Tu.

Langganan itu akan membolehkan syarikat mengembangkan perniagaannya secara geografi dengan menawarkan penyelesaian logistiknya kepada Vietnam dan memanfaatkan kepakaran tempatan dan pengetahuan pasaran yang disediakan oleh dua pemegang saham lain, katanya.

Ketua Pegawai Eksekutif Kumpulannya, Datuk Ponnudurai Periasamy berkata pengembangan itu mencatat satu lagi peristiwa penting dalam rancangan perniagaan jangka panjang syarikat untuk mengembangkan perniagaannya di rantau Asia Pasifik.

“Kami percaya bahawa ekonomi Vietnam yang berkembang pesat dan persekitaran perniagaan yang menggalakkan akan membolehkan kami mengembangkan perniagaan kami, bukan sahaja menawarkan perkhidmatan syarikat kami seperti perkhidmatan logistik aeroangkasa tetapi juga membolehkan kami memberi perkhidmatan lebih baik kepada pelanggan sedia ada di rantau ini.

“Selain itu, mempunyai rakan kongsi tempatan dengan pengetahuan mendalam mengenai pasaran tempatan akan mengurangkan beberapa risiko awal yang berkaitan apabila memasuki pasaran baharu,” katanya.

Ponnudurai berkata AGX Group berharap usaha baharu ini akan menyumbang secara positif kepada masa depannya

-- BERNAMA